



Un Compromiso Nacional



Un Proposicion pa Salbuardia Nos Pais

**Union Patriotico Progresista
Aruba | 2014**

*“Nos no por pretende pa cosnan cambia,
si semper nos mes ta actua na mesun manera.” — Albert Einstein*

Introduccion: UN COMPROMISO NACIONAL

Na apenas un aña di eleccion pa Staten 2013, partido Union Patriotico Progresista (UPP), a sinti e necesidad pa presenta e documento aki cu ta hiba como titulo “Un Compromiso Nacional: un proposicion pa salvaguardia nos pais”. Nos a considera esaki como un plan di accion, como alternativa riba e situacion dificil y desastroso cu nos pais tabata pasando aden na e momento ey. Den e periodo di juni 2014 te cu oktober 2014 nos a intenta pa trece partidonan politico aki na Aruba hunto pa asina mira con nos por a salvaguardia Aruba su autonomia y para alaves e rumbo desastroso cu nos tabata bayendo aden.

Mirando e desaroyonan y acontecimentonan di e tempo ey, manera, un Koninklijke Besluit, e metemento di Hulanda, por medio di CFT, diferente rapportnan di institutonan internacional, Algemene Rekenkamer y Raad van Advies, cu ta muestra claramente cu nos gobierno tabata fayando barbaramente. Di otro banda nos por considera cu nos Parlamento su rol mediocre, como verlengstuk di gobierno, sin ta controla gobierno y haci su trabou manera mester, a perde tur sentido di legitimidad, moralidad y representatividad como organo mas halto di nos constitucion.

Parlamento su funcionamiento parece di a yega na e nivel mas abou di su existencia, unda cu en bes di ehecuta su rol di “checks and balances” a permiti pa wordo uza na antoho di un gobierno, haciendo e instituto aki un stempelparlament, un verlengstuk di gobierno, cu ta haci y deshaci. Por considera henter e desaroyo y resultado di e acontecimentonan durante aña 2014 y tambe di e ultimo lunanan aki, como un “brevet van onvermogen” pa gobierno y pa Staten di Aruba.

Apesar cu na prome instancia nos por papia cu e intento di aña pasa a fracasa, nos por bisa cu awe cu nos ta un aña mas leu, e situacion a empeora. Pues nos ta mira cu no tin ningun clase di mehoramiento. Incluso nos por bisa cu e polarizacion ta mas grandi cu nunca, mientras cu nos por mira con Parlamento mes a haci entrega di nos autonomia fiscal/financiero y na mes momento mina su propio autoridad y derecho di budget.

Saliendo for di e declaracion di Nacionnan Uni di derechonan politico di ciudadanonan, UPP ta considera como puntonan importante nos democracia y nos estado di derecho, cu no conoce su miho momentonan. Tumamento di decision na Aruba ta bay cu yen di manipulacion, sin e transparencia necesario y hopi biaha yen di intimidacion, fomentando asina e “cultura di miedo”.

Democracia no ta unicamente e forma di gobierno of e sistema electoral. Democracia ta e sistema cu mester percura pa salvaguardia y mehora e bienestar individual y colectivo, unda cu cada ciudadano ta sinti cu e ta forma parti di un comunidad, cu e ta wordo scucha y cu e ta sinti cu e ta wordo trata igual (pues unda no tin politica di patronahe).

Libertad, igualdad, integridad, respet mutuo, democracia participativo y husticia ta hopi importante. Den sosten na democratisacion di nos comunidad y e sistema politico, ta esencial promocion di transparencia, bon gobernacion, interes y consciencia politico. Esaki entre otro pa medio di reformacion di nos sistema parlamentario democratico y sistema electoral, mehoracion y renobacion di nos sistema di gobernacion, dunamento di servicio eficiente door di instancianan gubernamental y maneho di finanzas publico responsabel. Tambe ta importante restablecimiento di nos lazonan den Reino Hulandes a base di respet mutuo y den forma madura.

Mescos cu na juni/september aña pasa, na opinion di UPP, e gabinete actual mester tuma su retiro. Na su lugar mester bin cu un Gabinete di Transicion, forma pa no-politiconan (un sorto di Taken Kabinet) cu tareanan bon defini y pa un periodo di 6 luna te cu 1 aña, y cu ta tuma e pasonan necesario pa restablece ordo y prepara pa un eleccion nobo. Pareu cu esaki UPP ta propone pa bin cu un Cumbre Nacional, a la modelo di RCOA di añanan 1980, unda cu e tareanan y puntonan di atencion ta pa e Gobinete Transicion.

Dos aña despues di eleccion, na unda cu un campaña miyonario y di desinformacion a wordo hiba, unda cu medionan financiero di nos Pueblo a wordo derocha djis pa por haya voto, nos ta para dilanti e realidad di un crisis grandi. Un crisis financiero, un crisis politico, un crisis di mentalidad y un crisis di confianza. Pesey ta tempo pa den un Cumbre Nacional, cu representacion di tur organisacionnan politico, comercial, sindical y social, nos yega na un Compromiso Nacional pa asina yega na solucionnan duradero.

E puntonan cu UPP ta presenta aki mas bien ta puntonan cu tin di wordo trata den e periodo di transicion dor di un Gabinete di Transicion cu nos ta considera como problemanan serio, pero reconociendo cu tin otro puntonan cu dor di un gobierno nobo, despues di e periodo aki. Esakinan ta legio, tanto riba nivel di educacion, salud, nos grandinan, famia y hubentud, justicia y seguridad, medio ambiente y di energia.

Good Governance: MEHORA NOS DEMOCRACIA Y ESTADO DI DERECHO

Tres aspecto importante den cuadro di mehoracion di nos democracia y estado di derecho, cu ta den un crisis formal, ta e transparencia, eliminacion di e fenomeno di e politica di patronahe, fomenta democracia bibo.

TRANSPARENCIA

Democracia ta basa riba un compromiso entre e ciudadano, su Parlamento y gobierno. E ciudadano mester tin e confianza cu e ta wordo bon informa riba e actividadnan di gobierno. E ciudadano tin e derecho pa participa den e democracia aki. Sinembargo e ciudadanía por participa solamente den un proceso democratico si e ta wordo informa corectamente di e actividadnan y e maneho di gobierno. Esey ta wordo logra solamente door di un transparencia total di maneho.

Esaki tambe ta conta pa Parlamento. E ciudadano mester sinti di su Parlamento cu tin e transparencia necesario den toma di decision, e mester tin e confianza cu Parlamento den su nomber ta haci e control necesario riba gobierno y ta scrutina tur decisionnan cu gobierno ta haci. Parlamento mester haya e respet cu e merece pa asina e por eherce su trabou independientemente.

Ley di transparencia y informacion accesibel

Fortificacion di Ley di Transparencia di Maneho ta sumamente necesario. Ta importante pa banda di informa obhjetivamente, involvi e ciudadano activamente, pa asina e por evalua trabou y maneho di gobierno. Esey por solamente door di duna informacion regularmente na un manera sistematico na e ciudadanonan.

Obliga ministernan pa responsabilisa nan mes na Parlamento y Pueblo

Mester bin cu leyman pa habri e posibilidad cu Parlamento por obliga un minister duna contesta na preguntanan di Parlamento, apesar cu UPP ta kere cu un hende cu consenshi, lo no mester warda pa wordo dicta pa responsabilisa su mes.

Tambe mester bin un cambio di ley unda ta obliga e ministernan cu ta biaha, pa bin Parlamento prome cu e biahe pa duna splicacion kico e biahe ta encera. Tambe despues di su regreso. Di e manera aki Parlamento na un forma anticipa, y no via di prensa, ta wordo poni na altura di e meta di cada biahe, pa asina evita e sorpresa di protocolnan y combenionan cu ta mara nos pais, y cu Parlamento despues tin di djis guli manda bou.

Introduccion di un website nobo

Introduccion di un website nobo, banda di esun existente (www.gobierno.aw) na unda lo publica informacionnan clave y decisionnan di gobierno, parti pa ministerio y e departamentonan, mientras ta duna oportunidad na e comunidad pa duna su opinion of remarcanan.

Cambio di ceremonia di Aña Parlamentario

Contrario na loke a bin ta sosode manera un costumber parlamentario tur di dos diamars di september, mester bin cu un cambio na e forma con nos Gobernador ta wordo (mal)usa, dor di laga su persona lesa e declaracion di gobierno. Den e caso aki tin dos opcion, sea ta cambie y laga Prome Minister di pais lesa esaki, of ta laga Gobernador presenta plannan di gobierno, pero ta duna espacio pa haci comentario riba den forma di un analisis di e aña cu a transcuri den forma di un relato (basa riba e.o. informacionnan di ARA, RvA, y eventualmente Caft).

POLITICA DI PATRONAHE

Tur gobierno mester di bon mandatarionan, ambtenaar y bon companianan pa ehecuta proyectonan y asina logra metanan pa un pais. Na bienestar di pueblo y pa garantiza un trato igual, gobierno den un forma husto y cuidadoso, ta duna e persona- y companianan mas capas e trabounan pa ehecuta. Den e forma aki pueblo por confia riba servicio adecua y proyectonan bon ehecuta. Asina placa di pueblo ta wordo usa responsablemente, pagando e persona of compania cu berdaderamente merece di por traha pa nos pais cu placa di pueblo. Ora un gobierno no ta hiba un maneho responsabel y husto den esaki, y gobierno no duna persona- y companianan trabou a base di nan cualidad y experticio, pero pa otro motibonan, pueblo ta sali perdi. E fenomeno di patronahe aki mester wordo bringa. Algun di e cambionan cu por haci den nos leyman ta minimalisa esaki ta:

Ley di comptabilidad

Ley di comptabilidad lo wordo amplia pa loke ta e aspecto di destaho publico, dunando asina Gobernador un posicion di control den esaki. Tambe lo pone dicho landsbesluit y tur "onderliggende stukken" ter inzage na Parlamento pa un periodo di 7 dia, pa asina henter e proceso por bira transparente di berdad.

Nombramento husto

Depolitisa nombramento di ambtenaar- y contractantnan pa medio di un organo independiente consistiendo di hefe di servicionan relevante (mescos den e caso di VUT), mientras ta mara den ley e organizacion gubernamental y e cantidad di puestonan pa evita creacion sin mas di departamento y yena e aparato indiscriminadamente cu compinchinan, famia- y amigonan. Tambe tin cu mara e grupo di sosten rond di un minister a base di ley y na un nivel realistico, y hunto cu esaki tambe e presupuesto pa e gabinete di ministernan mester ta mara na un nivel realistico cu salarionan realistico.

Financiamiento di partidonan politico

Sostene introduccion di ley di financiamiento di partidonan politico, pa evita cu gruponan di influencia y aheno ta esnan cu lo ta determina politica y gobernacion di nos pais.

Evita conflicto di interes ministerial

Un aspecto den e ultimo añanan sigur ta e conflicto di interes di varios di nos ministernan. Antes den e Eilandenregeling tabata tin tipo di areglonan cu tabata tin como meta pa exclui e posibilidad di conflicto di interes. Den nos constitucion no tin nada al respecto regla, loke ta conduci na situacionnan cu ta cuestionabel. Banda di mara man di politiconan, ta necesario pa evita cu ministernan cu wordo nombra tin conflicto di interes cu nan. Ta necesario pa medio di nos constitucion obliga pa tene un proceso di screening, unda un comision ta investiga y determina e posibel conflictonan di interes cu por ta existi.

Duna cuenta di propiedad, bienes y debe

Tambe ta necesario pa hinca den ley cu tur esnan cu ta bira minister, esnan cu ta bay asesora ministernan, duna cuenta por medio di un declaracion di propiedad y bienes, mescos di debe, na Controlaria General, tanto na comienso como na terminacion di e periodo di representacion. Un ley asina tambe lo ta aplicabel pa esnan cu lo asumi puestonan den comisariadonan di compania di gobierno y tambe pa esnan cu bira miembro di Parlamento.

Persecucion politico

Ley pa pone minister personalmente responsabel den casonan cu ta persigui hendenan sin base, poniendo nan asina tambe personalmente responsabel pa e gastonan involvi y cu no ta gobierno, lesa pueblo, tin cu paga pa casonan descabeya, na momento cu e y su abogado mester por a conclui cu nan lo perde e caso. Asina aki ta pone ministernan pensa dos biaha prome cu ta persigui un hende politicamente, sin base.

DEMOCRACIA BIBO

Banda di e aspectonan di transparencia y patronahe politico, ta importante pa nos sistema democratico mes wordo mehora y intensiva. Mirando e desaroyonan di e ultimo añanan den nos sistema di democracia parlamentario, nos por constata cu e sistema di mayoria absoluto, crea pa nos sistema electoral, ta causando daño na nos pais. Un parti grandi di e problemanan cu nos pais ta pasa aden, ta crea pa un Parlamento cu no ta funcionando manera mester ta. E “checks and balances” no ta wordo practica y e prestacion mediocre di nos Parlamento ta causante tambe di e desaster cu gobierno ta hincando nos pais tur dia.

Reformacion di nos sistema electoral/parlamentario

Mirando e experiencia di ultimo 29 añanan cu nos sistema parlamentario y electoral, UPP ta na fabor pa cuminsa cu discusion riba esaki y mira te na unda cambionan por wordo implementa. Anticipando esaki e puntonan di “secuencia di number riba un lista” y “sistema di restzettel” cu UPP a presenta den pasado, por ta un prome paso den bon direccion. UPP ta mira cu e sistema electoral cu mester ta e fundeshi di nos democracia, ya caba no ta sirbiendo interes di e pais aki ni di e ciudadanonan. Mester bin cu otro modelonan tanto pa eleccion como tambe nos sistema di gobernacion, na unda ta minimalisa e poder di gigantenan politico cu ta uza miembronan di Parlamento como marionetanan y na nan antoho. Ya den e ultimo añanan nos por mira un disfuncionamento completo di nos Parlamento, na unda cu proceduraman parlamentario no ta wordo cumpli cu ne y proyectonan di ley e.o. no ta wordo discuti mas na nivel di contenido.

Secuencia di number riba lista

Asina UPP ta mira cu e ley electoral conoce pa cuminsa dos cambio cu por bai yuda mehora nos democracia, esta eliminacion di e secuencia di number pa candidatonan cu ta bai riba un lista y na unda cu ta segun secuencia di voto di e candidatonan ta determina e drentamento den Parlamento.

Sistema di restzettel

Un otro cambio cu UPP ta kere cu mester bin ta e sistema di restzettel, na unda pa evita cu votonan di partido cu no a alcanza e “kiesdeler”, ta bai perdi, esakinan tambe ta participa na

e ronda di “restzetel”. Esaki ta haci tambe cu e ciudadanonan cu ta sostene e partidonan aki, ta sinti cu nan votonan ta bal y ta haci e participacion civico mas grandi.

Mehoracion di funcionamiento di Parlamento

Den cuadro di mehoramento di e funcionamiento di nos Parlamento, UPP ta kere cu ta necesario pa kita cierto podernan, yama prerogativa, for di presidente di Parlamento. Mayoría di areglonan lo mester ta hinca den e reglamento di ordo, pa asina no tin discusion riba dje. Tambe mester mira e posibilidad di kita e posicion di Presidente for di partido cu ta sostene gobierno pa asina garantiza un mihor funcionamiento di Parlamento, dunando asina tambe e posicion di presidente di Parlamento un rol mas independiente.

Ombudsman

Den e cuadro di un democracia bibe ta importante pa bin definitivamente cu un ley di “ombudsman”, na unda cu e ciudadano por acudi, no unicamente pa problemanan cu e por encontra cu gobernacion, sino tambe na momento cu e ta sinti cu gobierno riba cierto asuntonan no ta practica e transparencia cu pueblo ta spera di dje. E leyman di “administratieve rechtspraak” y di “openbaarheid van bestuur” mester wordo scrutina pa e caso aki y mehora na unda cu esaki ta necesario.

Dialogo Nacional

Un aspecto hopi importante sigur ta esun di dialogo den comunidad. Pero esaki mester ta un dialogo sincero y di participacion berdadero. UPP ta mira cu mester institui por medio di ley un instituto di “Dialogo Nacional”, na unda cu na comienso di gobernacion ta determina kico ta e puntonan esencial cu ta puntonan di discusion. UPP ta scohe pa e modelo cu Sr. Betico Croes, d.f.m. a uza den pasado, esta e RCOA, unda cu tur gremio, incluso partidonan cu y sin representacion, ta representa. E instituto “Dialogo Nacional” no mester bira un simpel appendix di gobierno, na unda cu ta cierto gruponan, sin representacion necesario ni cuantitativo for di e comunidad, aparentemente ta “decisionmakers”.

Referendum

Den cuadro di un democracia bibe, unda cu decisionnan importante cu ta afecta fundamentalmente of economicamente un pueblo, bin cu e instrumento di Referendum. Asina nos por menciona p.e. proyectonan grandi manera hospital, green corridor, Urirama, lo mester tin un blessing di un pueblo completo prome cu gobierno compromete su mes. Y recientemente e ley di CAft no a wordo poni na un decision di Pueblo.

Finanzas Publico: CONTROL DI GASTO, APARATO GUBERNAMENTAL Y IMPUESTO.

Pa realiza bon gobernacion, un maneho di finanzas publico responsabel ta esencial. Di un banda gobierno mester procura pa haya entrada y di otro banda mester trata na domina su gastonan. P'ese gobierno mester tin un sistema fiscal simpel pero severo, cu ta haci posibel cu e ciudadano por probecha lo maximo di loke cu e ta gana, mientras cu Gobierno ta haya e parti cu ta toke pa asina ehecuta maneho, plan- y servicionan na bienestar di tur esnan cu ta biba riba e baranca aki. Mester ta un sistema husto na unda cu ningun ciudadano ta wordo privilegia riba e otro.

Pa e motibonan aki UPP ta convenci cu mester mara finanzas publico na leyman cu lo forsa esnan cu mester carga responsabilidad gubernamental pa mantene nan mes na normanan financiero sostenibel ariba termino largo. Historia y experiencia a demostra cu caminda no tin sancion pa mantene normanan financiero estable, hopi facil ta bai den direccion di endeuda un pais cu tur su consecucionan financiero y economico.

Nos debe nacional

Mara den nos constitucion cu e deficit anual no ta surpasa e 3% di nos Producto Bruto Nacional, pa evita cu pais y pueblo ta wordo comprometi cu gastonan, ya cu ora ta trata di compinchinan parce cu "the sky is the limit", mientras cu nos quota di debe nacional mester keda mara na un 40 pa 45% di Producto Bruto Nacional (GDP). Den esaki tambe ta inclui e obligacionnan financiero, manera debenan na APFA, SOGA etc.

Gastonan social

Den e cuadro di un Dialogo Nacional, mester papia cu tur esnan involvi, pa asina atende e fondonan social (APFA, AZV, SVB). Mester garantiza cu esun cu ta contribuyendo awor aki, tambe ta bin na remarca pa cobra mayan. Cambionan cu bini den nos sistema p.e. di AZV, no mester mishi cu e accesibilidad pa haya cuidu, particularmente pa nos grandinan cu ta depende di un entrada so, y tambe pa esnan di menos recurso. No por keda pospone cambionan necesario, haciendo e problema pio, te ora cu ta mucho laat y cu nos tur lo sufri e consecucionan.

Regula aparato gubernamental

Un aspecto importante den control di gasto ta nos aparato gubernamental. Nos ciudadanonan ta spera di ricibi servicionan for di gobierno cu ta poni como su tarea pa haci. Esaki mester ta eficaz, eficiente y na ora. Den e caso aki mester mira tur esnan cu ta traha den e sector gubernamental, incluyendo e sector semi-gubernamental (fundacionnan, n.v.-nan etc. di gobierno) como "sirbido publico". Esaki tambe ta conta pa minister- y parlamentarionan.

Mester bin cu un ley cu ta regula y reglamenta e funcionnan di consehero y coordinadornan rond di ministernan, mescos cu team di sosten na e oficina di ministernan. Esaki tin cu evita

cu defacto ta crea un di dos aparato publico politico costando pueblo hopi placa. UPP ta propone pa pone na discusion atrobe e rapport di Comision Wever di 1999, cu a traha riba un proposicion den e cuadro aki.

UPP ta partidario cu institucion di departamentonan ta sosode por medio di ley (landsverordening), den cual mester determina e cantidad di departamento, funcion- y posicionnan cu ta necesario. Pa yega na esaki lo mester bin cu un “kerntakenanalyse” cu ta determina e cantidad di tareanan y e departamentonan cu mester pa ehecuta esakinan. Asina ta evita e situacion caminda tin dos of te hasta tres departamento cu ta haciendo e mesun tareanan.

Miho servicio gubernamental

E sistema di un “ombudsman” como un entidad autonomo, manera menciona caba, tambe lo por contribui na un servicio mas miho y eficiente pa nos ciudadanonan. Un ombudsman mester bira e instancia cu e ciudadano ta entrega su keho na dje, entre otro di mal servicio di nos aparato gubernamental. E keho lo wordo investiga y lo exigí pa coregi e mal funcionamiento. E ombudsman aki lo mester ta los di gobierno, y ta raporta e.o. na Parlamento di Aruba.

Evalua funcionnan politico

Den e cuadro di controla gastonan gubernamental lo revisa e sistema di rangonan y tambe evalua funcionnan politico, e.o. e sistema di “raadadviseurs”, ya cu e grupo aki ta keda bira grandi y hopi biaha mayoria di nan ta inactivo (dependiendo cua gobierno ta na mando). Mientras pa esnan cu no tin trabou di haci, lo wak pa pone nan den un “passende functie” y si no logra haya nada lo ofrece nan un “afvloeiingsregeling” pa asina gobierno, lesa pueblo, no tin nodi keda paganan pa eternidad. Algo parecido lo mester haci tambe pa esnan cu ta den “overtolligheidspool”. Den e fase aki tambe lo mester mira e posibilidad di “her-, bij- en omscholing” pa asina mira con ta pone e personanan aki na trabou.

Preveni y combati corrupcion den aparato gubernamental – proteccion pa “klokkenluiders”

Tur ambtenaar huramenta of contractant cu haya trabou, ta compromete su mes na servicio den nomber di y pa pueblo. E concepto sirbido di pueblo mester wordo inculca den e empleadonan publico na unda cu esaki ta mara na norma- y balornan cu tur hende ta spera cu nan ta cumpli cu ne. P’esey no ta tolerabel cu un empleado publico ta peca contra nos leyman sea pa faborece su mes of privilegia otronan. Esaki tambe lo mester tin su sancionnan di berdad. Tambe pa preveni y combati corrupcion den aparato gubernamental, lo mester bin un fundacion pa “klokkenluiders” cu proteccion pa e “klokkenluider”, mientras cu lo mester bin un website y telefon pa avisonan y tips tocante eventual iregularidadnan. Ta trata aki di instancianan autonomo cu ta los di politica.

Servicio di impuesto

Segun UPP tur hende mester haya e mesun trato riba e tereno di impuesto, tanto ora tin cu paga como ora tin cu haya placa bek di belasting. No tin lugar pa hacimiento di excepcion pa un, y pa e otro no, ora cu ta trata di casonan igual pa ley, of cierto faborecimiento (politico). Mester existi igualdad y un trato husto. Pa elimina e tipo di politica aki riba menciona, a bira tempo cu e servicio di impuesto aki na Aruba bira un entidad autonomo, mas leu di gobierno y di politica. Pues un influencia politico minimal. UPP ta pensa aki na un estructura parecido na Banco Central y mara den nos constitucion. E modelo aki sigur no ta uno inusual, ya cu hopi pais tambe ta adaptando nan mes te na cierto grado di autonomia. A base di “guidelines”, manera ta wordo proponi door di Organisation for Economic Co-operation and

Development (OECD), por regla con un pais ta institui un servicio asina, na unda cu ta wordo regla tumamento di hende na trabou, preparacion di maneho, tumamento di decision etc.

Sistema di impuesto

Mester pone e mecanismonan di control cu tin “in place” funciona manera mester ta, pa asina gobierno ricibi e parti husto cu ta toke, pa e por haci su trabou pa comunidad y haci inversionnan necesario den nos economia y cu ta garantisa trabou duradero.

Den e cuadro aki UPP ta partidario pa un schuifmento di impuesto directo pa uno indirecto, mientras cu lo mester studia cierto cambionan den nos regimen di invoerrechten y accijns. Lo mester adapta nos inkomstentabel, bahando e tarifa di belasting riba entrada substancialmente, mientras BBO como impuesto indirecto mester wordo revisa y haci mas simpel y controlabel. Cu schuifmento di belasting directo pa indirecto, esnan cu ta traha “zwart” y esnan cu ta bishita nos isla, tambe ta bai contribui por medio di e belasting indirecto na e caha di gobierno.

Structura Estatal: RESTABLECIMIENTO DI LASONAN BASA RIBA RESPET MUTUO Y CU MADUREZ

Saliendo for di e lucha di nos grandinan y e logronan bou guia di sr. Betico Croes d.f.m. na e Conferencia di Mesa Rondo na 1983, defende nos autonomia, ya cu esaki por wordo considera como un logro importante y determinante den emancipacion politico y estatal di nos pueblo, cu ta duna nos e espacio necesario pa un desaroyo economico, cultural y social propio, manera stipula den articulo 1514 di e convencion di Nacionnan Uni, na un manera transparente, cu respet pa otro den Reino y cu e madurez necesario.

Mester reestablece e relacion cu Reino, cu den e ultimo año aki, particularmente den e ultimo lunanan a keda severamente afecta tanto pa e actitud intransigente y insincero di tanto gobernantenan, como parlamentarionan sosteniendo gobierno. Mester traha na restablece e relacion den Reino, unda Aruba ta haya e sosten necesario for di Hulanda pa loke ta concerni su desaroyo politico, estatal, social, economico, cultural, social y educacional. Naturalmente unda nos ta reconoce cu autonomia di Aruba na mesun momento ta nifica tanto derecho di nos pueblo, como obligacionnan den Reino. Y e ultimo parce cu hopi a lubida den e ultimo año y particularmente luna.

Internamente tambe nos mester compromete nos mes, cu na momento di cualkier cambio estatal of asuntonan estatal, mester tin un consulta previo por medio di e instrumento di Dialogo Nacional, manera ya splica anteriormente. E decision final mester ta den e man di pueblo por medio di referendum.

Tambe den e cuadro di nos relacion cu Reino, propone pa den cuadro di e 60 año di existencia di e Statuut di Reino y cu ta uno cu a wordo traha den un epoca post-colonial, revisa e Statuut aki, y bini cu un Statuut nobo, basa riba pensamentonan moderno, pero na unda cu nos autonomia y nos derecho di autodeterminacion ta keda manteni. Pues un revision di Statuut, envez di cada bez torno of cambia na articulonnan di Statuut. Hunto cu revision aki lo por traha na interpretacionnan nobo, cu na memonto di desacuerdonan esakinan por wordo trata pa colegionan independiente, pero basa riba interpretacion moderno.

Union Patriotico Progresista

www.UPPAruba.com

www.facebook.com/UPPAruba

upp.unista@gmail.com
